

## **Protocol**

---

**dalla radunonza generala dalla Surselva Romontscha (SR),  
sonda, ils 13 d'avrel 2013 allas 17.00 uras  
ella halla plurivalenta a Vrin**

### **Tractandas:**

1. Avertura e beinvegni
2. Tscharna dils dumbravuschs
3. Protocol
4. Rapport da gestiun 2012
5. Rendaquen 2012
6. Elecziuns
7. Program da lavur 2013
8. Varia

### **1. Avertura e beinvegni**

La presidenta dalla SR Annalisa Cathomas arva la radunonza cun far in cordial beinvegni e tus presents e presentas, cunzun als representants dallas autras uniuns da lungatg ed al president dalla Ligia Romontscha Duri Bezzola. Genau Ronnie Caminada e Martina Caviezel, anteriura canzlista da Vrin ed uss collaboratura dalla nova vischnaunca Lumnezia, presentan Vrin a moda fetg simpatica.

### **2. Tscharna dils dumbravuschs**

Tresa Deplazes e Heinrich Berther vegnan eligi sco dumbravuschs.

### **3. Protocol**

Il protocol dalla radunonza generala 2012 ei publicaus silla pagina d'internet dalla SR, [www.surselva-romontscha.ch](http://www.surselva-romontscha.ch), ultra da quei vegnan copias repartidas als interessents. El vegn approbaus unanimamein.

### **4. Rapport da gestiun 2012**

Avon che preleger il rapport da gestiun 2012 presenta Annalisa Cathomas las finamiras principalas dalla SR: promover e sustener il romontsch al cunfin linguistic, porscher maun en damondas dil lungatg, dar impuls per l'elaboraziun d'ovras culturalas romontschas, realisar projects cun sustener il diever dil lungatg el mintgadi.

Lu prelegian la presidenta Annalisa Cathomas ed il co-president Rino Darms il rapport e commenteschan quel cun projectar ils temas e las activitads che han fatschentau la SR il pli fetg igl onn vargau. Silsunter vegn il rapport approbaus.

Hans Caprez pretenda che la radunonza prenda ina resoluziun concernent l'applicaziun dil romontsch ella nova vischnaunca da Ilanz/Glion: Tut stoppi era succeder per romontsch, tut ils collaboraturs e las collaboraturas stoppien saver ni emprender romontsch, ei dueigi esser ina vischnaunca bilingua romontsch-tudestga cul num Glion/Ilanz. La presidenta Annalisa Cathomas informescha che ella ed il co-president Rino Darms seigien ses ensemen culs responsabels da Glion gia avon la fusiun. Ils da Glion havevien plitost la tema ch'ils Tudestgs vegnien discriminai ella nova vischnaunca. Ei vegn votau unanimamein da prender ina resoluziun tenor la proposta da Hans Caprez.

## 5. Rendaquen 2012

Il cassier Carl Caflisch presenta il quen che siara cun entradas da frs. 53'341.21 ed expensas da frs. 44'739.55, pia cun in gudogn da frs. 8'601.66. Il co-president Rino Darms prelegia il rapport dils revisurs Paul Valentin Solèr e Marcus Holderegger. Silsuenter vegn il quen approbaus.

## 6. Elecziuns

**Demissiuns:** Dalla suprastonza han Annalisa Cathomas, Rino Darms (da niev suprastont LR), Irina Lutz, Lea Berther e Manuela Schnoz-Flury demissiunau, Erwin Vincenz che ei staus representant dalla SR ella suprastonza dalla LR stat era buca pli a disposiziun per la suprastonza. Il cassier Carl Caflisch engrazia ad els per lur lavur prestada per la SR e surdat in pign present. Dils delegai han Giusep Capaul, Vreni Caprez-Spreiter, Rita Killias-Cantieni e David Carigiet demissiunau. Annalisa Cathomas engrazia per lur engaschi e surdat a quels ch'ei presents in pign regal. Tenor statuts ha la suprastonza dalla SR da secumponer da minimum tschun persunas ed ella ha 15 delegai ella LR.

**Elecziuns/Reelecziuns:** Heinrich Berther propona Vitus Gartmann da Sevgein sco niev president, il qual vegn eligius dalla radunonza.

Ils dus suprastonts Carl Caflisch e Simon Bundi che stattan a disposiziun per in'ulteriura perioda d'uffeci vegnan reeligi.

Sco novs suprastonts e suprastontas propona Heinrich Berther Flurina Cantieni-Gliott da Laax, Angelica Arpagaus da Laax, Alberto Palaia da Glion, Andrea Kobler da Glion e Jan-Andrea Bernhard da Castrisch. Era els vegnan eligi dalla radunonza. Ils delegai Martin Cabalzar, Martin Gabriel, Paul Valentin Solèr e Duri Sulser che stattan a disposiziun per in'ulteriura perioda d'uffeci vegnan reeligi.

Sco novs delegai vegnan Francestg Friberg, Curdin Maissen e Toni Schmid proponi ed eligi.

Ils suppleants Meinrad Cadruvi, Tresa Deplazes, Hans Huonder, Beat Pfister, Brida Sgier Gartmann e Franziska Willi Weggler vegnan reeligi.

Medemamein vegnan ils revisurs Paul Valentin Solèr e Marcus Holderegger reeligi.

## 7. Program da lavur 2013

La suprastonza veglia finescha aunc ils projects gia iniziati: reediziun „Nossas praulas“, niev cun in dc cun differentas praulas sco giugs auditivs per sursilvan; sets da jass e da troccas; ediziun dvd „Safari“.

In impuls ord la radunonza ei da translatar in cudisch per affons da 10-15 onns.

Francestg Friberg pretenda che la SR s'engaschi per mieds d'instrucziuns romontschs idiomatics en differents roms. El presenta la resoluziun (mira annexa) als presents. Heinrich Berther sustegn quella proposta e supplichescha era il president dalla LR da s'engaschar per tals. La resoluziun da Francestg Friberg vegn approvada dalla radunonza.

## **8. Varia**

Damai che negin giavischa il plaid, siara la presidenta Annalisa Cathomas la radunonza cun engraziar al co-president Rino Darms ed als auters consuprastonts sco era alla Ligia Romontscha Surselva per la buna collaboraziun. Medemamein engrazia ella alla vischnaunca da Vrin ed a tuts presents e presentas e giavischa in bien retuorn a casa.

Mustér, ils 15 d'avrel 2013

l'actuara

Manuela Schnoz-Flury

Damonda alla radunonza generala dalla SR dils 13.04.2013 da prender ina resoluziun davart ils mieds d'instrucziun idiomatics:

## **Resoluziun**

Els suandonts roms ein ils mieds idiomatics u inexistents ni ch'els cuntentan in summa buca, quei muossa era il sondadi dalla Pro idioms Surselva realisaus la primavera 2012:

- rom romontsch
- rom realias per las classas primaras (carstgaun ed ambient = geografia, historia, biologia)
- rom tudestg ord vesta romontscha, 3. tochen 6. classa primara
- rom textil (tuttas classas)
- lungatg, carstgaun ed ambient per la scoletta

La situaziun pertuccont ils mieds d'instrucziun numnai per las scolas romontschas e bilingas dalla Surselva ei alarmonta.

La radunonza generala dalla Surselva romontscha supplichescha instantamein la Regenza grischuna dad instradar ton pli spert la realisaziun dils mieds d'instrucziun basigneivels, vul dir ils mieds d'instrucziun els roms numnai sura.

13.04.2013/FF